

四庫全書

集部

欽定四庫全書

集部

清風亭稿卷五

詳校官庶吉士_臣陳若霖

中書_臣劉源溥覆勘

覆校官中書_臣汪師曾

校對官中書_臣嵇承志

校對官庶吉士_臣嚴福

謄錄舉人_臣張元功

謄錄監生_臣范來沛

欽定四庫全書

清風亭稿卷四

明 童軒 撰

七言古詩

賦得石頭城送孫學正之京

石城嵯峨如鐵壁，睥睨雲霄高百尺。
石頭千古枕江流，六代繁華有遺迹。
昔人城此今已矣，尚有功名在人耳。
古堞殘鴉噪夕暉，空壕宿鷺迷寒雨。
孫君才調不可羈，蚤年問學為名師。
懷賢每賞袁公節，勵志常期士行為。

君今北上朝天闕五月江城促行色城上薰風吹客衣
城邊折柳傷離別朝來微雨浥輕塵江水流波草色新
行看高步雲衢上當使功名勝古人

杏林春意為醫士凌永誠賦

豈不聞董仙昔日居廬峯醫全造化通神功功存利濟
不責報年多植杏成芳叢君家亦是岐黃學金匱名方
紹高躅拯世寧論子母錢活人贖貯君臣藥一來賣藥
知幾年聲華不減匡廬仙回生起死亦無數深林種杏

如公田綺疏春暖涵晴日赤箭青芝正初出都人爭植
不辭勞斲碎香苔破春碧土脉陽和雨露肥青枝茁出
皆蓓蕾忽然一夜春風動千樹萬樹紅霞開年年二月
復三月兒女爭看好顏色不羨玄都觀裏花寧誇太華
峯頭葉看花曾記上林游花壓烏紗照醉眸晴雪墮霞
粘翠箔綵雲飄影下朱樓于今南國睽違久惆悵東風
一卮酒卧病閉門春色深長吟北望頻搔首感君為我
活沉痾援溺扶危惠實多五株豈足報君惠為賦杏林

春意歌

贈清貧長老

黃金沙界名淨土中有僧為持教祖說法能超最上乘
常感天花向空舞禪關盡日白雲封為愛踈閑似遠公
秋雨涼蟬三徑葉夕陽歸鳥一聲鐘支願夜坐林間石
白月清潭了無迹問師戒臘今幾何笑指青松數千尺
有時聚石來講經石頭盡點如有聞有時浮楫去渡海
踏碎萬頃玻璃雲歸來清梵維摩室何用區區九年壁

降龍解虎人不知惟有閭丘老人識

孤飛脊令圖為馮生題

馮生攷與其弟裕俱以民俊補京庠諸生無
何而裕之墓木拱矣一日攷以此圖請詩予
傷其意因題數語歸之

衰荷倒影湖西水枯翠蕭蕭卷寒雨藕花零落金粉殘
獨有蓮房結青子脊令孤飛斜日晴急難應念雙飛鳴
秋原有夢不可到野水寒烟空復情

題驄馬南巡卷送郭侍御清軍貴州

戊寅年作

東都昔稱桓侍御凜冽冰霜動朝著乘驄到處懾英雄
九陌人行且避桓郎一去今千載六察寥寥繼丰采
鐵冠白簡誰可方喜有汾陽後人在君今年纔二十餘
琅琅聲價高璫璣發奸摘伏振風紀星軺幾誦皇華詩
昨朝又捧明光勅遠赴邊疆閱戎籍一泓冰斧手中持
五色春雲衣上織昂藏攬轡氣如虹繡轂銀鞍虎綬紅
一道飛霜隨駐節九霄甘雨逐乘驄乘驄取道巴渝路

重疊青山莽田互。氍帽峯頭日欲低。琵琶峽口雲初度。
褒斜南去即苗夷。苦竹黃茆夾岸齊。飛鳥衝烟投古磧。
斷猿啼月掛深谿。雙旌遙度烏蒙嶂。眼底貔貅拜相向。
未須搏擊樹奇勲。且慰蒼蒼遠人望。

趙松雪寫東坡小像并書其山城杏花詩內相
錢公出視命題因次原韻如左

漚波漲碧蘭苔

苔溪吳興地名

春王孫英標真可人。眉山老仙

招不起。東風誰薦溪頭蘋。清興懷賢應淬發。一夜松窓

歌白雪曉來點筆為傳神宛似臨臯步明月杏花零落

山城中悠悠往事如雲空何當共飲玉堂酒

坡詩共飲玉堂無事

酒半枝燭影搖殘紅

松泉雲壑圖

長風吹雲度澗壑上有千尺青松枝飛泉百折走其下
倒影欲赴蜿蜒垂秋空月白羣籟寂翠濤隱隱生漣漪
天生神物自竒拔肯與灌木爭榮萎盤根錯節飽霜雪
却憶移種徂徠時薦蘿翳翳若纏縛服食未許食流脂

政如蛟龍卧巖穴飛騰有待雷雨期又如大臣值國難
冠劍廷立相扶持紫鱗乾澁裂苔蘚屈鐵交錯排旌麾
信知硯硯始生恠不恠豈易知其竒明堂屢建不收用
無乃材大難為施良工筆挽造化力滿紙圖出煙雲姿
王生雪蕉竟何謂蕭郎雨竹空離披何如此圖神且古
古稱韋偃真其師李侯持之索題句我見百色生鬚眉
安能為君一叱起毋令偃蹇荒山陲

雪窓上人蘭蕙圖

西川上人號雪窓丹青好手誰能雙時時泚筆寫蘭蕙
古屋陰澗如懸幢何年貌此清無址怪石踈篁映流水
翠帶新翻鳬渚烟紅芽亂吐鷗汀雨我昔舟行湘水頭
碧雲兩岸蘼蕪秋滿林烏鵲自相語不見王孫來此遊
此時欲把江籬薦彷彿靈均曾識面西風帆急去如飛
歌斷離騷并九辯偶從滇南披此圖萋然叢棘相紛敷
援琴欲寫意難盡宛對江潭明月孤滇南都聞好事者
臭味相看頗同價高堂畫永篆烟輕如坐光風與俱化

吁嗟蘭為王者香
深林寂寞猶芬芳
采之我欲獻天闕
肯使鷦鷯鳴秋霜

松雲軒為陶希文先生題

當軒植長松
蒼翠墮寒玉
風吹白雲來
就我簷端宿
我昔挾策去
排雲叫天扉
胸中一萬字
五色雲錦輝
當時一出真
堪重直欲擎
天架梁棟
何知匠石匪
竒工縮手
旁觀不能用
歸來巢雲入
雲中翩然解
組凌飛鴻
風流酷似孟
夫子

見李白贈孟浩然詩

孤高不減廬山翁
朝看松上雲

暮撫雲下松雲開絕壁倚翠色蜿蜒千尺蟠虬龍怡情
愛此雲松好金粉堆香晴不掃怒濤翻壑瀉長空老鶴
一聲山月小此時抱雲松下眠紅塵不到心悠然夢回
散髮一長嘯但見白雲萬頃秋無邊君不見長安重桃
李賣松入市難求利又不見孤雲離海東漠漠還山尋
舊蹤雲飛無心任舒卷松勁有節欺霜風悠揚不學膚
寸合偃蹇豈與羣芳同長材辜負廊廟器大志蹉跎霖
雨功白衣蒼狗自千變何年十八君為公

竹溪清隱卷為吳崑王益題

并叙

吳崑王益清修力學士也所居戴溪之旁種
竹數千挺以資吟賞之娛每溪水生風碧雲
蕭颯萬玉皆作鳳鸞聲坐而聽之使人悠然
有遺世獨立之意因題曰竹溪清隱間索予
詩為賦此章

黃陵日暮愁雲綠千頃寒波蕩人目何人笑把金錯刀
剪碎湘羅千萬束君家住向東吳東縮地誰移錦繡龍

春風迸出玉萬箇琅玕繞屋聲玲瓏羨君習隱溪亭裏
時放扁舟渡溪水掀蓬長嘯碧雲低一片瀟湘響秋雨
歸坐幽窓月色涼紅塵不到水雲鄉芙蓉風颭翠蛟舞
千尺冰簾搖冷光頗似求羊散稍類嵇阮狂煮茶燒筍
幽懷好拄笏看山清興長浩歌淇澳詩閑傾桑落酒世
間萬事等浮漚兩綬通侯不須有君不見長安甲第連
雲起衛霍金張耀朱紫洞房月夜度歌鍾綺窓曉日聽
鶯語一朝事異人亦非蒼苔滿地客游稀蠨蛸罨壁蟲

吟戶廢址淒涼對落暉何如君家舊竹溪年年清趣樂
無涯花深紫燕巢書屋波暖銀魚墜釣絲子生偶被浮
名掛寧堪作吏金門下卜隣願借屋頭溪長日釣簾共
清話

觀捕魚者

東風昨夜吹湖曲一川清水參差活漁郎舉網唱新詞
棹破粼粼鏡光綠妻孥汲甕具朝飧江籬紫笋豚魚新
隣舟自小共鄉陌來往相看那更嗔輕鴻點點穿雲杪

綠楊細雨寒生早
數聲柔櫓下中流
烟水微茫遠山小
山水圖為沙士清題

青山一片知何處
雲際依稀辨汀樹
春來泉壑盡爭妍
翠雨溟濛飛薜荔
山下茅茨凡幾家
小橋流水竹林斜
陰陰蘿逕留啼鳥
寂寂柴門掩落花
故人家住錢塘曲
彷彿當年舊書屋
望海樓頭夕照明
富春郭外平蕪綠
西湖高柳拂晴烟
載酒時乘賀監船
驚嶺朝涵霞氣潤
鷗波夜逗月華圓
竭來旅食秦淮邸
回首湖山渺何許

詩興常尋仙姥雲夢魂幾聽胥江雨
南宮先生筆有神
畫圖重見李將軍
晴窓暇日一披玩
萬壑千崖盡在門
太常夏仲昭墨竹為莊憲使尚源題

使君愛竹如愛玉
日日故園看不足
一朝我豸入中臺
老栢啼烏恒在目
京師寸土如寸金地窄
那堪栽半林
此君不見歲已久
幾回夢落湘雲深
容臺仙吏才非俗
胸中騰貯簞簞谷
清興時時掃襪材
硯池風雨吹寒綠
何年寫此妙莫當
贈君不減雙明璫
高標稍類螭頭筆

直榦猶含柱下霜君今長憲滇雲外高節清風誰不愛
紅紫羞看世態多冰霜不改虛心在閑來對此不勝清
耳邊疑有蛟龍聲何當截作仙人杖携上紫霄朝玉京

哀都憲張先生

并叙

先生張式之四明人也以詩大鳴于時邇以
奉表之京遂有鼓缶之變予哀之不能忘也
因為長詩以洩予情

大雅寥寥久不作疇能接武三百篇西都蘇李最卓犖

遺音近古猶堪傳後來文章建安骨七子磊磊爭雄先
晉朝鮑謝亦僅數淵明製作真天然悠悠理趣自蕭散
不學小伎呈雕鐫齊梁之下委靡不復振紛紛聒耳喧
秋蟬有唐作者相繼出一代雅奏鳴宮縣楊王盧駱首
竒拔高岑韋柳堪齊肩天生李杜實冠絕光燄萬丈直
視人無前閔時憤事吃吃不離口彷彿古意猶能全先
生生居百世後蚤有巨筆如長椽胸中吞吐經子史頃
刻變化驅雲烟由唐直泝到漢魏歷取次和無遺編大

而宇宙明日月神恠幽隱枝葩連掄揚諷詠不一足豪
思溢出有若萬斛滾滾奔原泉詞場袖手莫敢敵況欲
掉鞅躋其巔平生精力盡斯學發為事業翰天淵三關
淨掃馘群孽六察總紀師多賢犯顏納說任斯道拯民
塗炭沉痾痊時時效唾落珠玉世人孰得窺其玄我生
幸獲識光霽低頭東野願執鞭先生不鄙笑謂我子作
可等盧玉川非才豈敢遽云爾先生善誘何勤拳昨朝
入覲上京國意謂簪盍期殘年孰知先生棄我去奄忽

羽化隨飛仙，鈞天帝都極。宏麗駭驚控，鶴上下相周旋。
文章在世萬古耿，不泯化為列宿河漢邊。芒寒色正燭
下土，要令天下羣瞽俱能辯。析姪與妍先生於斯固無
憾，我獨私心忼忼如烹煎。松風日夕起澗壑，助我於邑
淒哀絃。

山水圖次尚寶宋士皋韻

蘼蕪吐碧連洲渚，無數眠鷗不飛起。青山重疊畫屏開，
疑是朝來洗輕雨。新縛茆齋傍水鄉，濯纓幾度和滄浪。

相過况有知音在絕勝成都舊草堂

秋江晚眺圖為曹憲副廷彰題

廷彰家宰之猶子中書之兄也

金門畫史小李徒何年寫此秋江圖斜陽杳杳下林杪
隔岸幾點青山孤時當深秋八九月紅葉似錦烟中鋪
清霜蕭蕭悴高柳淺水獵獵涵疎蒲茅亭一箇傍山麓
人迹不到堆寒蕪就中豈無高尚者皓首甘作林泉枯
江頭二客久不去氣岸頗似黃與蘇抱琴何處覓知己
矯首眺望仍踟躕磯邊舴艋差可渡似欲放浪為歡娛

水清沙白秋正肅佳趣彷彿君山湖
斷霞留影帶殘雨連鴈欲下相驚呼
前村有酒可剽酤亦有巨口松江鱸
江山若此豈易得覽勝不來空負吾
望中疑是尚書宅青紅樓閣相縈紆
書聲隱隱起林壑劍氣熒熒騰天衢
年登百頃刈雲子歲晚千頭收木奴
地靈豈徒富物產人才項背無時無
鳳池烏府相照耀山川鍾秀信不誣
君家世業有如此輞川赤壁焉能逾
何時許我載輕舸與君汗漫直上尋
蓬壺

題劉推府湖山歸隱詩卷

內有八景

東湖荷花
鞍山嵐雨

茶園炮樹
柴衝夕照

望蕩春濤
松坪霽月

白沙漁唱
木嶺樵歌

湖山蒼蒼湖水綠灌木垂蘿遠塵俗高人小隱住湖東
坐對江南秋一幅昔年賓興歌鹿鳴平步青雲被推轂
一官佐郡粵南陲才大位卑羞碌碌晨餐束帶謁官長
夜火照書讞疑獄秋霜欺人髮種種老境漸臨如縛束
便當投劾自陳乞何事甘心累形役路指衡陽還故鄉

笑脫塵羈返初服湖山歸來故無恙生事雖微清興足
時時尋盟狎鷗鳥十里荷花照人目扁舟閑弄即南垞
菱角雞頭收百斛蓬窗幾度夕陽明桑柘柴衝接村谷
暝色依微宿鳥靜坐見松坪上團玉茶園烟靄樹參差
風動旗鎗香簇簇鞍山嵐氣欲作雨望蕩濤聲正翻屋
水清沙白木嶺高漁唱樵歌斷還續此時此景貌難盡
幽趣滿懷良可掬王暕方外齊逸駕諸葛隆中並芳躅
胡為去此趨末路名利擾擾生憂辱超然肥遯固始願

不學引年思辟穀隣僧野老日相過
旋折松茅煮溪藪
浮雲世事不須問濁酒一尊聊共漉
廟堂有政肉食謀
葵藿區區徒獻曝深源不出亦已爾
其若蒼生竟誰屬

竹溪書屋卷

竹葉蕭蕭溪水曲鷓鴣啼斷湘烟綠
數椽書屋小於舡
門掩清陰隔塵俗美人軒車期不來
雅懷杯酒向誰開
琅玕無實鳳鳥去碧雲日暮空徘徊

沙木和驛壁間二仙傳道圖擬定襄郭公作

蓬萊之山渺何許中有仙人聚如蟻雲深路遠不可致
遂令方士神其理神其理玄且幽刀圭一粒人爭求寧
知天地尚有盡茫茫萬物皆浮漚人生匪金石焉能形
獨留區區學仙子笑殺東家丘瑤池桃實竟何物可憐
王母蕭颯蛾眉秋空聞馭黃鶴不見來青牛丹砂卒難
轉白雪忽滿頭君不見少翁藥大骨已朽茂陵松柏悲
風吼

題菊菴先生輓詩卷

菊菴今都給事中
姚君景昭父也

菊菴先生天下士才器卓確傳能同讀書一目五行下
六經星斗羅心胸當年束髮試鄉舉已與老輩爭豪雄
文章溢溢萬斛湧不啻天馬行秋空詞場七試竟不偶
鐵硯欲獎仍磨礱登高解作子虛賦金玉擲地聲玲瓏
興來臨池恣揮灑彷彿義獻渠親逢園林頗似通德里
氣岸不減眉山公胡為一夕遽夢牒玉樓仙去何匆匆
遂令里閭失模範貿焉摘埴行途窮年深草色上翁仲
馬鬣一片青山封于今有子更奇拔明時科第高登庸

清詞醉草得遺訓耻學篆刻工雕蟲東臺列職近五載
諫疏屢上輸精忠天章褒異重厥自思被兩世頒雙龍
先生于茲固不朽光燭泉壤迴春風嗟予後學生已晚
不獲鉛槧相追從懷賢竊欲頌潛德安得巨筆如長虹

謝龍太守惠墨

徂徠斲碎青松骨竹屋篝煙香馥馥道人曉起探牀頭
掃得玄霜二三斛空山鐵杵聲相鳴日暖風和擣應熟
忽看滿桮走蛟龍疑有虹光射人目文章太守才且賢

贈我誼重黃金錢開緘捧檮發長嘆瑩然至寶真堪憐
我慚無才將奈此鎮日臨池弄池水楯端草檄屬何人
醉後濡頭竟誰氏有時窻下試一磨淋漓雲霧生江波
興來枝戟老鴉手塗抹稍類隸與科恨無山陰九萬紙
練裙多年不堪洗呼僮掃壁且題詩苔色滿墻秋正雨

過歌風臺

在沛縣

望夷宮中箭如雨芒碭山前五雲起沛公提劍走咸陽
百二河山屬真主烏騅已逝走狗烹叶威加四海來故

鄉臺前父老奉觴壽酒酣激烈歌聲長高皇龍去臺應
朽猛士何人四方守落日悲風動地來蕭蕭但見臺前
柳豈不聞姑蘇草長遊麋鹿銅爵年深野狐哭唯有陶
唐三尺階千載人思太平福

點蒼山

點蒼山色何奇哉芙蓉朵朵天邊開嶙峋直上九千仞
下視羣岫皆蓓蕾夸娥不能移巨靈不能劈南風十日
吹不平但見雲開橫鐵壁琪花瑶草四時閑幽致彷彿

非人間千年老雪消不盡龍湫六月生陰寒我欲乘風
升絕頂倒控蒼虬凌倒景黃鵠仙人招不來目斷蓬萊
五雲境

郭汾陽輕騎見虜圖

有唐國步中葉危長安宮闕胡塵飛履謙陷賊果卿死
二十四郡將誰支可憐不見平安火相國只謀行幸所
馬嵬坡下玉環啼靈武山前來興播此時名將知誰是
凜凜汾陽樹忠義故地初開河朔歸提書又自潼關至

兩京收復不移時，貝錦青蠅謗亦隨。
寧知突起涇陽禍，二虜馮陵逼帝畿。
節度不出淮西師，觀軍笑殺河中兒。
花門髻面似虓虎，健兒好手應難持。
汾陽遽畫扶顛計，免胄投身為虜餌。
馬前傳導令公來，回紇尋盟吐蕃去。
乃知天意眷忠貞，數語賢於十萬兵。
千載高名垂不朽，畫圖三復想儀刑。

雙馬圖為萬都閫子和題

金生畫馬纔二匹，彷彿當年韓幹筆。
一匹蹄攢首渴烏，

一匹紅雲滿身濕兩馬相向交嘴鬃宛如君家櫪上雙
飛鴻雄姿逸態迥殊絕曾向邊疆收戰功想應棄置歸
來後沙塞草黃龍骨瘦春雨遙思彩鳳羣秋風幾夢祥
麟廐此馬昔聞來向東驚駘萬匹皆成空偶因歷塊誤
一蹶按圖誰復知英雄吁嗟伯樂真難遇躡景追風亦
徒爾試看日晚太行間驥負鹽車但垂耳

仙居書屋為相國商公題

仙居之山幾千仞兮芙蓉萬疊屹然直上而孤撐攢峯

西來擁其下是為金華諸山兮左右環拱羅立而相迎
紅塵隔斷數百里時有彩雲片片生其間兮只疑方壺
圓嶠之在目丹崖翠壁掩映而霄崢玉堂老仙昔居此
誅茆縛屋時躬畊貯書萬卷日披誦列仙環侍皆儒生
當牕翠屏宜晚對飛流噴作瀑布聲亂藤蒼蒼掛寒雨
白石一徑香生蘅松風旦夕發清籟彷彿天上來鸞笙
幽深宛似白鹿洞脩然一段滄洲情有時縱步一登眺
但見琪花瑤草不可以名狀兮上有好鳥宛宛聲和鳴

老仙抱道非逃名慨然有志憂疲氓一朝飛步朝天京
萬言披腹琅玕呈玉帝見之喜首擢桂籍魁羣英十年
補袞作霖雨諸方入貢歌昇平列仙亦繼起先後俱登
瀛鏘鏘環珮趨承明文章班馬世所驚回首仙居山峩
峩天外橫想當太古毓元氣間世降此長庚精地靈人
傑信非偶高名可軋岱與衡何須采藥三山行何須承
露雙金莖乃知仙人在清世秦皇漢武白首望幸空無
成

朱寅仲寫杏林春意圖為內相素軒公題

何人貌此春意圖杏花照眼紅模糊滇城朱氏稱好手
點染自謂當時無初疑桃源在人境溪水無風明似鏡
落紅滿岸誤漁舫不見秦人來問訊復疑金谷桃李春
東風紅紫幾回新豪華轉首成消歇不見花前勸酒人
摩挲細認久乃得知是匡廬董仙宅門外青山萬仞高
香爐五老森羅列天然一段幽竒趣金削芙蓉隔舊世
箇中茅屋幾人家流水閒雲自來去飛嵐掩翠望中迷

古木寒藤夾岸垂，抱琴來訪者誰？子徑度不避溪橋危，
蒼苔白石連松島。五陵遊俠經過少，門靜常時下鹿羣。
溪晴幾見飛鷗鳥，先生開牕心澹如手攤一卷岐黃書。
平生有志在經濟，不作良相為良醫。活人不取青蚨直，
種杏成林還自適。年年花發正春風，一片朝霞絢晴日。
朝霞一片樹頭紅，赤城彷彿遙相通。從來種德知多少，
但見春深子滿叢。實成更有於菟守，不似隣園襍花柳。
綵雲遮戶最宜詩，香雪撲簾堪對酒。先生一去經幾霜，

畫圖高行至今揚蘇耽橘井應同調王母桃花可並芳
文章內相耽清致購圖不惜千金費高堂相對澹忘情
移得山林在城市

附栢梁體

呂氏節孝卷

金陵呂氏家本吳少膺姆教如羅敷伊昔笄年美且姝
嫁得良人君子徒雙飛婉轉鸞鳳鵠胡期一朝鏡影孤
懷中弱嬰聲呱呱高堂况有白髮姑昨者與君為歡娛

何忍背棄如路途矢心清白永不渝寸局皎若秋霜俱
朝課兒書夜緝繡膏沐不御淚眼枯天胡不弔姑且痛
顙天求代頻號呼天愈姑病不負吾而今春秋雪滿顙
天書褒異下清都節孝大扁題門閭我愧為儒七尺軀
行年四十百行無聞母高誼敦薄夫為作歌詩付董狐

清風亭稿卷四

欽定四庫全書卷

清風亭稿卷五

明 童軒 撰

五言律詩

春雨卧病書懷 十首

春半連朝雨空齋睡起遲閉門迴俗轍煮茗淪詩脾小
菜生新甲閑花發舊帷條然成吏隱虛負盛明時

一室朝慵掃遺經自討論枯蝸寒羅壁黠鼠靜翻盆調

古誰同賞時清道益尊閑將貧富態書向翟公門

避地營書屋蕭然一二椽官閑非逐客病久似癯禪犬
吠南中雪蛙鳴井底天物情徒自爾吾且守吾玄

積雨空齋裏春寒未袂衣道窮知己少鄉遠去人稀柳
濕低吟檻苔深濕舊扉自慚無勁翮不是惡羣飛

門巷春泥滑山川曉霧昏其言猶豹隱端勝類鶩蹲掃
徑除花纈編籬護竹根平生憂憤志惆悵與誰論

密雨隨風急虛齋日晏眠詩瓢高掛壁茶竈冷炊烟飲
乏高陽侶貧無負郭田悠悠清夢裏吟遍行波牋

澹泊真無事迂疎百不能守株思得兔點筆悞成蠅行
古從人笑家貧免盜憎居然叨素食渾似戒州僧

勿訝非吳下深慙令海鹽舊琴蛇腹斷新筆鼠鬚尖詩
苦非因債官清不為廉窓前山色好終日坐鉤簾

用世才偏拙治生計益窮接離巾倒著櫓杜火初紅病
喜聽琴愈書因看劍工茫茫天壤內何必楚人弓

狡兔謀三窟寒鳥借一枝浮名成底用薄俗不堪醫竹
色團書屋芸香落硯池投閑聊爾遣知命復何疑

雨中東鄭廣之揮使

咫尺長安道思君日倚樓寒烟籠野色春雨暗江流燕
麥悲新況鶯花感舊游何時一相見攜手步滄洲

閑居漫興十首

卜地構軒楹心閑樂自生土花凝碧嫩林葉溜紅輕月
射簷牙白泉穿石罅清自緣幽興足初不為逃名

未老已偷閑蕭蕭屋數間栢傾螺殼紫冠製鹿皮斑隱
几聞啼鳥鈎簾見遠山秋來無一事衣佩盡紉蘭

舉世長昏飲疇能問獨醒門無題鳳字囊有換鵝經種
就花成錦移來石作屏閑中供一翫相對眼偏青

一榻清於洗脩然思不羣紫苔行處滿黃鳥坐來聞琴
奏梅間月碁敲石上雲蒲塘新水暖花落覆輕紋

自識清堪樂誰云俗可污泉烹建溪茗香靄博山鑪月
冷梅魂瘦風清鶴夢孤近來疎懶甚簪組意俱無

歧路竟喧紛心閑苦不聞字臨王逸少詩學鮑參軍竹
裏敲茶白花前倒酒尊嵇生本高致寧肯在雞群

門迳掩蒼苔清幽絕點埃投閑惟樂道多病孰憐才竹
每穿籬引花常稅地栽一簾飛絮晚游俠不曾來

遊跡衡門下棲遲得自由梅花懸小帳蓮葉汎輕舟事
業慚鳴鳳生涯笑拙鳩塵纓何處濯門外有清流

鎮日掩柴局長歌醉復醒草生元亮井竹覆子雲亭煖
玉碁棋局秋金鑄硯屏都將舊游事一笑晚山青

樗散真成癖支離類隱淪林深多綠蘚地僻少紅塵酒
熟頻畱客詩成不寄人清風無限樂即此見天真

晚至華陰擬唐人作

馬首日將晡行行歲欲徂古祠寒蘚合仙掌斷霞孤山
暝聞啼鳥溪晴見浴鳬洛城知不遠宮樹晚模糊

贈范外史

寄跡朝真觀烟霞世外心封書憑鶴寄吹笛學龍吟寶
氣千林玉丹光滿竈金有時飛珮響渾作步虛音

題連雲棧

鳥道由來險經行感客心蛩聲吟亂葉虎跡印深林

武關

青橋二驛近
聞有虎食人

零露沾衣濕輕嵐障日陰王程未可住四

牡正駸駸

積雨青陽道中

浙瀝連朝雨驅馳道路中泥深愁沒馬草滿畏飛蠓

有蟲

如大蠅土人號為
蠓簪蟄人輒座

重霧山含毒驚湍石漱風

山下有溪皆巨石飛

湍已將身許國何敢怨途窮

五丁峽

憶昔梁州域曾聞貢篚來孰云千里險功自五丁開溪

惡蛇蟲雜林深虎豹哀那堪登峻嶺我馬正躓雕

寓白塔寺偶題

夜宿招提境蕭然世外蹤雨腥龍出洞月冷鶴歸松影
露林間塔聲傳澗底鐘空門應不鎖常借白雲封

謫所有懷舊游諸友

憶昔論交日相知盡少年季良身任俠叔度世稱賢夜
雨彈棋局春風放酒船飄零各分手愁絕越江邊

夜坐感懷

獨坐悲前事悠悠十載期黃芽難變骨黑髮已成絲慷慨班生劍淒涼楚客詞更闌不能寐起視夜何其

懷劉通政時用先生

吾鄉多俊彥夫子獨超羣詩妙唐人法詞工漢史文精忠縣皎日高誼薄行雲為別今三載空懷晉鄙薰

懷康繡衣用和

壯歲登烏府昂藏自不羣印章驅吏佩諫草避人焚面冷霜飛鐵衣香繡蹙雲何時重會晤尊酒細論文

懷劉繡衣廷高

鄉里交游輩情親喜見君一緘勞寄意兩地惜離羣
白馬人傳疏雕龍世愛文幾回馳戀切春樹暗江雲

懷丘秋官時雍

黃甲題名姓刑曹列縉紳律身清似玉持法藹如雲
白也詩無敵羲之字有神別來成間闊幾度仰清塵

懷胡繡衣以道

氣節摩霄漢文光射斗杓禮闈高擢桂憲府早乘輶
曉

日聽鳴鳳秋空見落鵬君才有如此不負聖明朝

題林塘別業

林塘多勝趣雲物四時幽山色供詩料波香引釣鉤高
原收鴨脚淺渚摘雞頭賸有烟霞癖無煩使者求

白沙民舍

初日照林扉山深客到稀柳溪鶯獨嘯麥隴雉雙飛少
婦提筐出中男荷畚歸盛時征賦少生事莫嫌微

九龍灘晚泊

九龍灘下泊烟景暗蒼苔樹影臨流出鐘聲渡水來江
空鷗伴少風急雁羣哀正爾懷人切愁雲滿釣臺

漁者

一葉扁舟裏蕭條生計微犬依茶竈卧鷗逐釣絲飛不
識功名路渾忘寵辱機溪頭新水綠欵乃日忘歸

富陽晚眺

渺渺江邨路扁舟薄暮過人家連竹塢野燒接山阿鴈
影驚秋遠潮聲向晚多推篷無一事閑聽棹郎歌

暮過山寺

寂寂南朝寺荒涼露遠郊夕陽僧掃葉秋雨鷺辭巢
斷碣猶橫草遺龕半覆茆道傍泉湧碧疑是虎曾跑

舟中雜詠

六首

買得扁舟穩渾如米氏船看山篷屋坐待月柁樓眠
鷗靜偏怡趣魚多不論錢南風十日好百丈漫須牽

去去朝京國圖書滿畫船丹楓連水驛白鳥沒江烟
候吏朝撾鼓漁歌夜扣舷盛時官況好何異去登仙

秋水青於染官河放去艤波光平草閣山色到篷牕細
雨猿啼獨踈烟鷺下雙鶻懷正牢落誰與倒銀缸
翹首金臺道孤舟幾日程隴雲迷客夢江月照離情遠
水連天白高河下露清不堪涼夜永蟋蟀近人鳴
孤鶴掠予舟橫江白露浮天長秋水濶雲淨晚霞收斗
酒聊相慰江山足壯游篷窓今夜月應似在黃州
薄暮推篷坐吟懷自爽然青山遮驛小白鷺點波圓野
曠風生籟江空月在船夜闌清不寐屢欲挾飛仙

吳江道中

掛席吳江路長吟趣不窮
輕兒眠野艇鮮鯽上絲筒
照水蒹葭白酣霜橘柚紅
此中鄉土好應不愧幽風

東林小隱卷為沈處士題

二首

小隱東林地身閑歲月忘
曲池山倒影虛閣水生涼
雨潤琴絲慢風薰藥臼香
隱君清趣好無夢到巖廊
游俠經過少衡門盡日扃
草香侵座綠山色墮樓青
野服裁荷芰園蔬煮茯苓
脩然塵市外不減聘君亭

孤鴈

離羣應已久遠地只孤飛月冷呼聲疾雲閒顧影稀蕭蕭蒲葦老粒粒稻粱微幾夜回塘夢分明向北歸

廣陵

日暮添鄉思孤舟宿廣陵晚風搖酒旆寒雨濕漁罾影暗原頭樹光微渡口燈故園何處是歸夢香難憑

清河

日暮勞行役官河駐短篷漁燈寒照水牧笛夜吹風缺

月斜窻入流雲極浦通不堪吟望斷天外叫孤鴻

舟經武城有懷同年伍令尹

寂寞居民少蕭條古木疎岸明殘雪在川暝落霞初渡
口人看鴈灣頭姬賣魚臨風思茂宰掩袂一欷歔

流河

早發流河路西風歲晏時白烟連遠戍黃葉下高枝野
老趨鄉集

北人呼
市為集

漁郎祀水祠太平風土好隨處樂雍

熙

磚河

夜泊磚河驛鄉山此地賒朔雲低度鴈關樹冷啼鴉官
况憂米薄霸懷病後加不堪歸夢斷明月滿天涯

道傍古碣

遺碣知何代離離碧蘚迷夕陽牛礪角秋雨蚓蟠泥牧
豎羣敲火行人半認題空遺千古恨愁絕峴山西

戊子冬備員朝覲僑寓灣中逆旅值風雪大作

有感

憔悴窮途客餘生只自憐懷人長兩地去國又三年白
髮悲難變青袍弊欲穿不堪風雪夜夢繞紫雲邊

與許漢英秀才夜話

白下棲遲地睽違又十年蹉跎雙鬢改險阻一身全夜
雨溪南業秋風墓下田別來空有夢惆悵未能還

雪

旅館人初到長空雪正浮和雲埋野樹雜雨響江樓凍
澁班生劍寒欺晏子裘憑誰歌郢曲一洗客邊愁

塞上

萬里隋城北愁雲一望迷雪深邊馬健月黑隴狐淒遠
戍連烽火寒沙莽疾藜將軍多暇日遊獵王闕西

除夕

旅館逢除夕淒涼歲欲徂異鄉家是客薄宦病為軀華
髮欺人老青燈伴影孤春風明日至誰共飲屠蘇

偶書

自笑謀生拙算瓢屢晏如貧無求米帖病有絕交書補

履空慙劍逢元欲戒車何時拂衣去重擬結蜩廬

祿脤驛和祝廷瑞侍御壁間詩韻

京國雲山遠悠悠入夢思頻年縻薄宦何日是歸期魚
鴈音書杳風霜道路遲窻前殘月白起視夜何其

鶴慶道中

巖深多險阻馬足正淩兢暝雪依巢鳥斜陽歸寺僧林
疎鳴敗葉澗古積堅冰去去無辭遠荒山又幾層

贈明上人

悟得西來意禪關養性靈
藤陰侵座滿竹色覆池青
洗鉢魚吞飯傳燈鹿聽經
自無名利夢不著息心銘

憶金陵四首

金陵佳麗地風景想依然
城闕金湯固江山罨畫連
晚風樓上笛春水渡頭船
惆悵曾遊處而今又幾年

自古興王地繁華勝足誇
闢難名巷小牧馬舊坊賒
稚子春騎竹園丁曉賣花
漢家宮闕麗王氣結紅霞

為憶江東地風光信可憐
侯門深似海官道直如弦
妓

女釵簪薦兒童紙放鳶何時賦歸去醉向酒樓眠
建業僑居地悠悠入夢賒秦淮橋畔月靈谷寺前花銀
燭張燈市青帘賣酒家時清人自樂簫鼓度年華

滇南即事

四首

自昔梁州域西南路盡通碧雞名岫遠金馬故關雄羅
婦裙花布蒲蠻臂柘弓聖恩同覆載處處樂時豐
謾說滇南俗人民半雜夷管絃春社早燈火夜街遲問
歲占雞骨襍凶瘞虎皮輜車巡歷處時聽語侏離

萬山藏古寨六詔雜諸蠻
焚女頭籠帽蕃僧耳墜環
啖蛇傳土俗屠犬祀神姦
更有西戎種輕生賦性頑

老稚羶為服侏離語更譁
湯池皆可浴石鼓不堪搗
土產饒山錫官租半海肥
信知南地暖常吐四時花

送侍御胡先生還朝

四首

門地臺端重才名柱下雄
清霜隨擊鶻甘雨逐乘驄
諫草多危論詞葩有古風
試尋名宦傳應與昔賢同

黃甲聲名大烏臺歲月長
風霜飛北闕山嶽動南荒
獻

納才追黯澄清志似滂應圖邊徼事歸去奏明光

按部滇南省昂藏孰與同羣宛如盡雪六察欲生風
驄馬人皆避豺狼迹自空獨慙知愛者名玷皂囊中

萬里來南國觀風肅憲綱詞鋒橫白筆家世等青箱
忠露丹心日威凝鐵面霜行看天上去補袞佐虞唐

月夜聽琴偶作

空山明月夜有客坐絃琴細把清商調彈成太古音
花深胡燕語木落楚猿吟此意鍾期解寥寥千載心

京口夜泊

維舟京口岸惆悵舊吳都寺遠鐘聲杳城高月影孤
江楓人獨宿汀葦鴈相呼無限淒涼思寒潮打敗蘼

附五言排律

久雨一百韻

庚辰六月淫雨四十餘日大水瀰望壞人屋
辟軒憂病中值此困憊可知因成五言排律
一百韻以寫予懷

久雨連旬朔陰霾盡日垂長途泥活活陋巷水滴滴雲
重傾如注風迴颺若絲纖綿還浙浙明滅更祁祁驟若
聞吳語閑如却楚師四簷頻淚滴千里盡膏陂入夜星
微見凌晨霧復彌涓涓通竹溜密密灑茅茨洄澤深三
尺遙峰露半規須臾流澗壑咫尺隔天涯河伯胸襟濶
飛廉號令馳蹄沕俄擴量蝸室僅容錐幟閃頻驚缺輪
停久緩羲未堪脩襖袂且可澣塵縑屋覆翻危棹梁空
瀉漏卮波搖張氏宅潮沒峴山碑豈是桑田變虛勤砥

柱支千家奔逐逐萬櫓去題題只訝天成漏渾疑

闕

卑青蒲梳細浪綠藻舞芳漪亂草萋迷發閑花掩映披
原高滋蚌蛤江漲怒蛟螭蝶翅方粘粉鴟巢正護危侵

堦衝蟻子沈竈產蛙兒跳足商羊舞垂翎衛鶴疲馬牛

行莫辨

見莊子
秋水篇

鳥雀下還遲瑟縮窺魚鷺沾塗曳尾龜

屋頭鳩逐婦牆角雉呼雌不見搖烟麥那看向日葵田

夫憂損稼漁叟畏漂籬涇渭奚能別枵車枉用施末期

收小菽何暇望維秬民庶

闕

官軍

闕

時

闕

浮

大渚闕

立荒陲衣袂俱沾漬旗干半倚旒妻孥憂饋
餉老稚苦啼饑米訝珠為價薪同桂作枝人將虞墊溺
誰為訴瘡痍高卧陶彭澤長吁杜拾遺乘興空有惠版
築謾勞持白日何時見頑陰不可麾高阿尋馬覓下坎
拔鳬茈蛄螭形難指陰陽沴若斯共愁雲壓地那想雪
翻匙嗟我常兼僕憐人更泣歧不能援隻手祇是蹙雙
眉難假浮槎力長吟苦葉詩穿渠思鄭氏興利慕劉彝
門澁苔痕上牕昏樹影篩瓢傾顏子飲布滲董生帷竹

几朝難凭藜牀夜屢移書空頻吐吐戮力正任任篝火
烘新畫牽羅補舊籬一羶渾不棄兩履鎮相隨鄉絕人
傳信門無客問奇詩因愁易得病與懶相宜劉氏耽三
癖梁鴻賦五噫漫興浮海歎何惜買山資官况連朝薄
鄉心半夜悲徙居將久矣縮地欲何之便好乘蘭舫聊
為啖水芝兒嬉泥作徑婢怪竈難炊寸步行還碍通宵
坐不辭萬間思廣厦百斛運深池溽濕憎藤簟涼生怯
葛絺短筇朝倚壁吟笏晚支頤治業無仁僕論心少故

知張油聊爾避塞土竟何裨潦倒遭時謗擲掄被鬼嗤

却憐成獨立

杜用

曾謂失羣疑

易遇雨而吉
群疑亡也

江漢憑誰詠

尊鱸動客思迂疎真自拙塵俗本何羈命也嗟難達形

乎覺易衰守株無兔觸設網有鴻離雜慮紛旁午中懷

耿鬱伊謾勞措病目空復撫吟髭已分烟霞想寧容造

化窺志厭如酩酊神困若饑羸因憶堯君政猶煩禹足

胝循環天數定剝復理堪推前志明垂訓強陰每致茲

變和須有在寅亮豈無為弭變由誠感回灾本德祈干

戈思有省帑藏戒無私刑臬猶當慎征徭必用咨游僧
驅冗費汚吏汰膏脂疾苦詢三老公勤勅百司溝塍防
夏潦雩祭謹春祠撫世酬三德求才立四維朝廷升大
化海宇仰重熙禮樂斯明備華夷悉撫綏自然登至治
底用問希夷玉燭和難戾金天世可追三光應順叙萬
福盡來脠苑囿鳴祥鳳郊園出瑞麒昆蟲咸遂育庶草
盡蕃滋甘雨應知候仁風必應期共遵皇極路永建太
平基願撰東封事兼陳既醉詞排雲叫閭闔稽首獻龍

塤

輓鄧處士

侍御鄧鍾英之祖也鍾英與其叔允哲俱仕北臺

舊業山中路春風草又青
雨昏翁仲石雲掩少微星
州里懷恩澤鄉閭失典型
高風人仰斗潛德世留馨
地卜眠牛兆囊存相鶴經
夕陽閑竹浦秋雨掩柴扃
下澤車仍在山陽笛忍聽
我者高士傳誰築聘君亭
臺柏雙枝秀庭椿一樹零
懷賢空灑淚忍誦蔡邕銘

九月三日渡錢塘江觀潮

揚帆過錢塘秋潮正掀湧浪花蹴天飛濤影壓雲涌初
疑海窟沸復訝地軸動雪山半空來雷鼓六丁擁陽侯
叱洪威海若扇餘洶聲喧戰馬馳勢怒老蛟聳雲夢敢
言大吳會詎敵勇錢弩竟虛發越舟盡成恐快哉天下
奇異矣澤中孔斜陽一鏡平飛鷗集如蛹

題西蜀江山圖

畫裏蠶叢國三川盡在眸關城連遠堡形勝入邊樓落
日烏蠻夕西風白帝秋斷霞飛極浦微雨暗芳洲茅屋

題工部祠堂記武侯柳垂瀘上步花發瀼西頭萬里橋
猶在三巴水自流數拳懸岸口百丈上灘舟灑瀕高於
馬岷峨列似蚪嶺猿啼灌木杜宇叫荒丘地僻琴臺古
山深劍閣幽野花供客況江草喚人愁使節曾經駐仙
槎擬再浮白雲渾似舊錦樹鎮常留彷彿登臨處依稀
汗漫游披圖一長嘅飛興繞西陬

清風亭稿卷五

欽定四庫全書

集部

清風亭稿卷六至八

詳校官庶吉士臣陳若霖

中書臣劉源溥覆勘

覆校官中書臣汪師曾

校對官庶吉士臣嚴福

謄錄監生臣范來沛

謄錄貢生臣秦聯登

欽定四庫全書卷

清風亭稿卷六

明 童軒 撰

七言律詩

丙寅中秋對月

秋色平分月正圓南樓清興浩無邊雲闕

懸丹桂

水滿龍宮泛白蓮萬古山河闕 舊百年身世欲登仙

何當喚起臨臯叟斗酒中流共放船

題清隱山房卷

幽居渾似聘君亭門對青山盡日扃一榻闕吟處颺

半牕松雨夢回醒鴻都官好羞闕觀門深懶議經

一卧空林驚歲晚無人知有少微星

咸陽晚眺

渭水東流落日西咸陽秋色望中迷荒烟古渡人稀到
衰柳空城馬自嘶霸業已消三月火斷碑猶載數行題
東門牽犬人何在空見年年碧草齊

襄陽懷古

足馬南歸望故城半林殘雨夕陽明雲邊岫接秦山色
樹裏河流漢水聲墮淚有碑苔色古攔街無曲酒旗橫
那堪回首成陳迹笳鼓西風愴客情

送徐遵誨公子之邊

羨君家世舊簪纓百戰常懷報主心草檄有才追記室
登壇無路繼淮陰射鵬紫塞秋雲黑走馬黃河夜雪深
白首丹衷知未變歸來雙肘印懸金

春水一首次張叔勉韻

湖北湖南燕尾分半篙纔動綠如芸薇花溝

薇花溝見揚州郡志

小依橋見桃葉歌長隔岸聞細草斷冰鷗外浦斜陽晴

笛鳥邊雲晚來幾陣知時雨

杜春雨詩好雨知時節

灑碎玻璃萬

頃紋

鳳西草堂一首為鄒義官賦

清隱臺西地位奇四時佳趣自相宜秋風蘿蔓垂茅屋
春水桃花近竹籬勸客小姬歌白苧遣懷新句寫烏絲
相過況有知音在不用黃金鑄子期

詠馬蹄墨一首東畱守鄭廣之玉峯李景輝二
知已

汗血曾勞百戰場空遺路鐵在文房硯臺夜跡元霜滑

筆陣朝衝紫霧香削玉

杜高蹄
削玉寒

謾勞龍作劑

墨名龍
香劑

藏

金

漢武鑄
馬蹄金

聊藉豹為囊

豹囊藏墨不壞
見文房必用

可憐一蹶無人

識却欲追蹤後二王

題瑩僧官禪室

地隔紅塵接上方亂藤高竹暝蒼蒼半屏夜坐雲牙冷

一飯朝飧石髮香
雨後降龍歸
呪鉢月明棲鶴下
迴廊
我來欲問西來意
安得醍醐灌頂涼

客中清明感懷

小衾孤枕興蕭然
況是清明到客邊
千里有家憑遠信
一春多病但高眠
梨花淡月秋千影
楊柳東風蠟炬烟
揔是少年行樂處
只今惆悵酒尊前

贈傅少府俊

公才儒行共稱賢
百里勞君早著鞭
夜靜柴門無犬吠

畫閒公館有魚懸桑麻時雨連城郭桃李春風被管絃
應是棘林鸞鳳翼九霄雲淨看高鶩

寄張景華

泮水曾同詠碧芹多君丰采更超羣十年謾學屠龍技
五色爭誇吐鳳文劍匣秋風飛電影硯屏春雨亂星紋
別來無限相思意目斷江東幾暮雲

簡溪為吏部吳主事題

溪上幽居敞竹扉溪邊春水淨苔衣吟抄甫里新詩句

坐買嚴陵舊釣磯
雲去青山當戶立
雨來白鳥傍人飛
也知習靜真成簡
游俠無勞問是非

次韻李商隱無題

四首

憲掩蟬紗怯晚風
刺桐垂影曲房東
自憐燕谷無春到
誰信藍橋有路通
藥玉杯擎鸚鵡綠
團金帶束荔枝紅
十年一覺繁華夢
羞見青銅兩鬢蓬

夢斷行雲會晤難
翠壺銀箭漏初殘
小衾捲繡香猶在
李團扇題情墨未乾
滿院落花春事晚
一庭芳草雨聲

寒機中幾字迴文錦安得夫君一笑看

梨花滿地月明來虛聽宮車響若雷
綆斷銀瓶難再續鎖開金鑰又空回
行雲謾想高唐夢咏絮誰憐謝韞才
莫把春心比香燭等閒篝下冷成灰

花暗芳塵憶舊蹤巧鶯簾外度歌鐘
緋羅襪襯雙鈎細金縷衣薰百和濃
露冷雲廊吟桂葉月明水殿看芙蓉
而今往事渾難省愁絕巫山十二重

題嚴子陵釣臺

遺臺臨水鬱蒼我西漢高風耿未磨歲月忽驚人已遠
江山如待客重過一書尚想狂奴態五鼎空張諫議羅
四望壽陵何處是青山依舊屬漁蓑

和劉工部無題四首

垂楊門巷嫩寒餘銀鴨香清繞燕居粧鏡窺紅春有態
黛蛾分綠畫難如雲飛巫峽頻牽夢潮隔潯陽久曠書
惆悵碧欄干外月梨花疎影到窓虛

金殿螢流月半沈謾思當日寵恩深風清香篋捐秋扇

露冷空閨急暮砧別院頻翻鶯管玉長門深鎖獸環金
可憐碧海青天外誰識姮娥夜夜心

鈿合鸞釵昨尚存幾看新水化生盆金魚戶鑰花千點
玉虎絲牽月一痕斑竹暝烟思帝子綠蕪春雨怨王孫
愁來更上危樓望江水悠悠也斷魂

簾外東風扇曉寒碧桃香老共誰看金鈴犬卧紅綿毯
翠羽鸚啼白玉闌花暗小機塵舊錦草深回磴罷鳴鑾
晝長寂寞無人問自起閑敲響玉盤

癸未大禮慶成錫讌

蓬萊閣下慶成時佳氣葱葱靄玉墀千載風雲光祿讌
兩輪日月太常旗香飄黼宸瞻龍御樂奏簫韶聽鳳儀
青瑣小臣無寸補載歌天保祝皇釐

題鄱江小隱圖

鄱江西上是吾家簾卷青山寂不譁楊柳晚烟迷燕壘
蘼蕪春雨漲鷗沙牙籤插架堆書帙竹筍懸流泊釣槎
今日長安看圖畫不勝歸興繞天涯

寒食漫興

黃鳥綠陰春樹濃
韶光大半轉頭空
一百五日寒食節
二十四番花信風
杜老只應償酒債
步兵何用哭途窮
人生遇景且為樂
莫遣霜華點鏡中

登甘露寺多景樓

一上高樓望眼醒
無邊風景入詩局
水連天去紫迴白
山過江來遠近青
秋草蝶飛全晉地
斜陽人語向吳亭
吟餘却愛空門趣
松下僧翻貝葉經

湖海壯遊卷為高仲顯題

不願功名竹帛垂半生蹤跡走天涯蛾眉亭下維舟夜
燕子樓前對酒時高節不殊東漢士行囊唯貯盛唐詩
相逢笑我為官累兩鬢蒼浪半欲絲

送張文元秀才下第歸吳

功名兩字古來難又向西風抱玉還點額自憐龍未化
澤文猶待豹成斑黃蘆淺水沙頭雨紅樹斜陽郭外山
他日重來應得意一枝仙桂看高攀

樂清軒為沙士清題

支離長日賦閑居
門掩青苔思有餘
春水漾花魚乳後
夕陽穿樹鳥歸初
逢人但錄修琴譜
對客常談相鶴書
更擬高樓營百尺
元龍豪氣未應除

丁卯秋予領鄉薦之京
三兄志廣偕親友飲餞
都門之外把袂而別
是夜宿龍江驛

萋萋草色滿長坡
況是連枝惜別何
客散酒空看鴈影
露寒沙白宿龍河
投林候火依稀見
臨水人家遠近多

自愧忘情非上智不禁清淚洒江波

癸巳歲予齒四十九矣宦績無成道德日負悵

然有感因作

久客懷歸尚未歸半生塵土浣征衣買臣每歎行年困
伯玉空知往事非春雨又蘇邊地草秋風應老故山薇
太平時世身難補會向滄江問釣磯

輓李恭人

太守李克昭之內

鬱鬱埋香刻翠珉高風重惜鮑夫人良妻內行思賢宇

孝婦佳名重史臣
鸞影曉分金鏡月
鳳梭春暗錦機塵
雲駟一去無消息
南澗東風長綠蘋

九日 四首并序

予以幽憂之疾閉門不出者動閱數旬眉宇
向秋淒然愁絕故人尚寶宋公忽有治城登
高之約辭不能赴因誦杜子重陽獨酌杯中
酒抱病起登江上臺之句不勝幽興滿懷於
是想像治城風物為賦律詩四章詩成會鄉

友傳德修攜諸公登高詩卷來遂用書之于

左

授衣又值景荒涼澤國砧聲夜有霜病後欲尋元亮隱
愁來無復孟嘉狂樹連涼館迷秋色潮落橫塘冷夕陽
却憶冶城山上約不勝清興攪吟腸

涼館橫塘俱
建康地名

鴈下菰蒲宿雨收登高有客上林丘池荷卷翠花皆老
江樹翻紅葉盡流白下蕭條偏近晚新亭凋敝不宜秋
良辰無那成虛擲孤負黃花酒滿甌

蕭蕭木葉下高枝又是深秋九月期黃菊酒香人病後
白蘋風冷鴈來時參軍帽落誰同調宋玉詩成益自悲
有約不能逢一笑看山窓下獨揩頤

幽亭結構號飛龍風景蒼蒼入望中鴻鴈去來時叙換
江山登眺古今同綠荷淺水棲寒雨黃葉虛窓戰晚風
秋興滿懷禁不得倚欄搔首歎飛蓬

送釋思齊往揚州

泠然飛錫自揚州却被紅塵數日留灑翰不殊懷素筆

工詩還似至弘流青松掛月山城夕黃葉填門野寺秋
此日不須騎鶴去渡江唯用一杯浮

輓陳侍御尊府

由刑部員外陞
郎守致政卒

解組歸來鬢未絲訃聞驚悼哲人姜白雲司職明刑日
銅虎分符作郡時隋淚有碑遺澤在去官無硯後人思
最憐南國霜臺夕月冷啼鳥繞樹枝

輓永新伯許公

百戰縱橫偉丈夫兩隨黃鉞定神都指麾天地紆籌畫

驅逐風雲入陣圖
金券有書曾錫土
玉闕無路更彎弧
承家主器今良將
麟閣功名負不孤

送陶希文先生校文浙江

自昔文衡荷至公
多君膺聘去匆匆
騁驩不假千金市
麟鳳須教一網空
夜舫星辰文壁燦
秋堂風露燭花紅
也知東浙多才俊
蕭李行看在藥籠

題澄江草堂卷

愛汝澄江草堂靜
白沙翠竹相鮮新
銀魚雙尾不受釣

黃鶴孤飛却近人柴門流水歲將晚藥裹書籤時自親
天書何處正物色老矣徵君烏角巾

送李道士還蓬萊山元陽觀

夫容角冠黃錦衣少日塵寰知息機去家千里每入夢
躡舄一年今始歸放鶴傳書山月白檄龍行雨海雲飛
明朝拂袖向蓬島芝草琅玕秋正肥

贈宋縣丞兼東岳太守文璣

一官佐縣丞負予藉甚才名播兩畿相逢已是三年久

復會其如千里稀牆邊種竹清興足廳下哦松生事微
郡守亦知徐業在解矇應爾日相依

登內相素軒公聚景樓

高架城樓遠市喧滿前風景似桃源斜陽語燕晴穿巷
流水浮鷗日到門四面青山都近屋一林黃葉半依村
幾陪內相叨清讌却笑山翁醉習園

送學士錢先生奉使日南

金函封詔降殊方共仰懷柔軼漢唐萬里清風馳使節

卷六
九霄春雨下蠻荒天低銅柱蛟雲黑路轉珠崖蚌月光
珍重先生宣帝澤會看重譯盡來王

輓袁尚寶柳莊

門地才華孰與同蚤從潛邸識真龍十年金馬天邊召
一夕黃熊夢裏逢謾有高名齊北海喜無遺草論東封
那堪回首鄞江路翁仲春深碧蘚濃

酬姚世昌千戶見贈之作

多君志慕玉門關誓策奇勲萬里還馬援自知才可試

馮唐誰謂老猶閑好風細拂青油幕明月光搖寶劍環
應笑麒麟千載後幾人名姓畫圖間

次韻李商隱無題

飄飄身世一虛舟去住還應作遠猶事業有時能破蔡
功名無意願封留牛羊落日三山路鴻雁西風二水秋
悵望不勝頻弔古故鄉何日大刀頭

送吏科右給事中潘

闕

奉使琉球

列職黃門久著聲又看持節過東溟金函曉捧神堯勅

銀漢秋占使者星，蜃氣結樓烟外出蛟涎。觸棹雨餘腥，
懸知到日夷人悅，翹首紅雲拜帝廷。

戲書一首柬陶松雲知己

到處看人白眼雙，可能健筆巨如杠。三千里外虛糜祿，
二十年前學問邦。吟聳肩山朝易倦，愁翻心浪夜難降。
令人羨殺陶元亮，一枕清風卧北窻。

寄賀友菊先生

窮巷蕭條坐掩關，冠纓塵滿謾思彈。半生杜甫空懸室，

十載揚雄不徙官
世事真成棋局換
生涯無奈硯田乾
鏡湖詩叟聞應笑
信有人間行路難

暮春舟中感懷

春色三分大半非
不堪遷客正懷歸
江蘼漠漠豚魚上
岸草青青燕子飛
潘岳多情愁髮短
馮唐易老壯心違
君親恩重何由報
佇立東風淚滿衣

題逸庵卷送王封君還廬陵

榮沐封恩下禁鑾
白雲遙指故鄉還
湖山有待今猶昔

歲月多情老更閑
引水遙通新藥逕
編籬重護舊柴關
東風沙浦春波綠
誰謂鷗盟半已慳

思兄

一從南甸別連枝
幾度看雲淚滿頤
畫錦已成槐國夢
春愁空賦草堂詩
兩年為客三千里
一日思家十二時
願得君王賜骸骨
東風花底叶墳簾

荅丁鳳儀仍次來韻

一官多病故交疎
遠道勞君問起居
敝帚千金空自許

短檠二尺竟誰如頗因吟苦嫌詩債長愧時清乏諫書
郭隗臺前重回首數行春樹正愁予

賀人建橋

揮却千金為衆謀忽看百尺駕清流濟川事業君堪許
題柱功名我未休草徑夕陽無駐馬柳陰春水有橫舟
令人却憶乘輿處多少居民病涉愁

贈楚山禪師

簡縣人

掉頭不肯事王侯雙樹為家老即休錫杖躡空曾解虎

木枯浮水不驚鷗夕陽咒食臨花塢秋月談經上竹樓
應笑我曹身是夢風霜兩鬢為誰憂

南坡草堂為張侍御題

草堂張君
尊翁所創

占得南坡一段幽前人曾擬掛冠遊草塘夜雨生蝌蚪
花徑春風叫栗留下榻每因詩客話敲門時有野僧投
他年驄馬歸來日會合塢簾酒滿甌

輓劉宗文處士

平生高行世應聞吳下衣冠又失君范氏有田惟種義

孟嘗無客不能文
青山舊業苔應沒
華表新阡日欲曛
歌斷楚騷招不起
寒雲空掩竹間墳

癸未八月濫竽禮闈文衡同事楊維新先生有
詩見及用韻和之

重簾閒寂似深閨
黔技何堪一試蹄
多士昂藏將得雋
五經模印細分題
龍蛇夜陣戈聲肅
風露秋堂燭影低
明日春官奏桃李
榜花聯采燦文奎

五星羣聚夜堂明
精鑒何慚月旦評
利穎喜從囊底出

良材時向爨中鳴
紙屏浙浙秋聲早
葦箔蕭蕭月色晴
應想白袍如鵠立
幾年門下望衡平

和秋林驛壁間大行人張器之詩韻

使車遙度古梁州
行色俄驚及早秋
淺水黃茅山外路
斜陽紅樹驛邊樓
牛羊出沒居民少
豺虎縱橫過客愁
前路安岳遂寧
俱有盜賊嘯聚
回首故鄉何處是
清霜一夜上人頭

二月花朝山縣小飲有懷金陵故舊

一官作縣寓山鄉
慚愧流年已二霜
對酒此時懷李白

看花前度別劉郎乾坤白髮詩愁在風雨青山客思長
惆悵不堪成契濶歸飛空望鴈行行

九月十三日夜夢繡衣康用和握手話舊覺而
聞雨有感詩以寄之

宦游歲月易蹉跎青鏡流光兩鬢皤客夢不知江水遠
鄉心偏傍雨聲多張衡有詠唯愁在燭武無能奈老何
為問舊游驄馬客別來誰與共鳴珂

送吳祭酒先生考滿赴京

早歲龍門釣六鰲詞林胄監被恩褒董狐筆挽千鈞力
司馬文稱一世豪賢相雲霖思已久諸生山斗望何高
行看奏最承殊寵天近爐烟襲錦袍

題杜子美草堂

性僻耽詩死不休文光萬丈謫仙儔浣花溪上頻年興
飯顆山前半世愁風送雨聲江閣夜雲涵星影草堂秋
可憐一片經綸志短褐長鐙到白頭

題諸葛武侯祠

抱膝長吟志有餘
出師勲業竟何如
龍蛇謾想驅兵陣
魚鳥真疑畏简书
鐵甕有城荒歲月
銅臺無主易丘墟
請看當日隆中路
猶自清風一草廬

贈青羊觀道士

青羊道士無姓名
繞簷種竹門常扃
蒼龍來問大還訣
白鶴下聽藥珠經
六銖衣上繡星斗
三尺劍底驅雷霆
相逢似識五雲吏
一笑向余雙眼青

仲冬初九夜江瀆廟祭纛

斗轉參橫月半斜
柳營人馬寂無譁
轅門露冷寒吹角
江廟風清夜禡牙
振地軍威嚴虎豹
翻空旗影動龍蛇
願將一掬丹心血
剖露孤忠報帝家

次韻翰林周堯佐先生詠雪禁體

八首

禁素白粉玉梅梨鹽絮及焦酒烹茶梁園灞
橋凡雪中故事

一夜隨風綴遠林
萬條僵樹盡森森
濕欺漁叟蓑衣重
寒入詩人布被深
江浦烟雲藏凍蟄
野田桑柘噪饑禽

閉門盡日相知少
呵筆西齋只自吟

同雲一色灝皚皚
地面平鋪不見苔
萬樹恰如花片落
八窻渾似雨聲來
迢迢竹迳朝初掃
寂寂柴門午未開
謾說長安有貧者
不知何處是春臺

高阜稜層下坎平
望中銀漢覺虛明
當窻不辨青松色
近水惟聞折竹聲
無數鷗羣眠淺渚
一行鴈字跡高城
吟窩此景須增價
紙帳圍屏分外清

風攪長空亂似麻
疎疎密密遍天涯
氣清頓覺詩懷爽

寒破方知酒力加
百畝田疇年可卜
孤舟蓑笠趣偏嘉
夜窻一片松梢隨
驚起巢林幾點鴉

灝氣瀾漫六合同
半兼寒雨半隨風
連朝流水成新凍
一夜青山失舊峰
廣野兔迷高下窟
長途人斷去來蹤
漁邨僧舍無邊景
都入先生賦詠中

非沙非屑迴無塵
六出天然剪刻新
積路崎嶇妨過客
撲窻撩亂惱吟人
看來樓閣疑鋪畫
飛入園林似放春
酒伴高陽盡凋落
小爐榾柮自堪親

片片飛來影半潛
潤回陽脈底須嫵
樽空謾用春衣典
爐冷頻將宿火添
帶雨續絃輕箸砌
傍人零亂巧穿簾
也知內翰多清興
愧我徒將賸馥沾

結陣凝團亂拂衣
即看突兀礙林扉
金牛去後埋空嶺
黃鶴飛來失釣磯
幾處笙歌方沸鬱
數村烟火正依稀
塞驢破帽長安客
日暮衝寒尚未歸

全居卷為姑蘇張彥廣題

歲月無情易白頭
青山穿穴且夷猶
杖藜登眺非狂傅

荷鍾謳吟似醉劉明月一規虛繭室白雲千頃閼丹丘
何人為樹東門櫝寧識神仙汗漫遊

送奚元啓舉人會試

青霄萬仞步徐徐經世文章錦不如家學舊傳田氏易
行囊新註伏生書月明野店聞雞早雲冷關河見鴈疎
此去大魁應有日佇聽雷震禹門初

奉寄柯太常楊洗馬劉侍講王修撰諸先生

黃金臺上袂初分回首江東已暮雲明月何時重對酒

碧山終日謾思君
縣城斜日平蕪靜
旅店西風落葉紛
我有孤懷何處寫
燈前愁誦楚騷文

寄康侍御

千里謫宦豈勝匍匐歎流光之遲暮
念心事之未明遣興微吟用告知已

驅馳謫宦走江皋
鏡裏流光有二毛
才薄敢思宣室召
官閑空愧華州曹
交游滿眼誰傾蓋
懶惰何心自解嘲
回首不堪吟望處
鍾陵山色倚雲高

寒食書感

一百五日逢寒食節序催人有底忙
燕子東風人病酒
杜鵑斜月客思鄉
城南麥飯誰澆墓山下梨花自吐香
惆悵介推無復見朝來新火正生光

清明書感

兩年作縣越江湄回首鄉關未得歸
華髮又驚佳節換
青雲堪歎故交稀
山邨細雨梨花發茅屋東風燕子飛
潦倒不須嗟薄宦且將樽酒送斜暉

次韻沈石田見贈之作

不逐夔龍到鳳墀詩名藉藉滿天涯
雞林有價時爭售
狗監無人世謾知
春草池塘回謝夢
秋蘭堂戶思湘纍
那堪別後同明月
千里關山不盡思

丙戌上巳日

桐花初着雨
絲絲又值東風上
巳時千古蘭亭留勝會
半生萍水歎多岐
河橋細柳鶯聲早
驛路青山馬去遲
安得當年詩社友
相逢一醉習家池

贈萬都閭子和

坐擁貔貅一萬羣多君好武更能文
工書絕似班都護雅詠還同賈刺軍
細柳風清朝奏角團花霜冷夜占雲
太平無事邊塵靜擬策凌烟閣上勲

自述西提學回簡曹憲副廷彰

偶因剡薦誤乘驄行遍滇南障塞中
士習漸看鄒魯盛提封應比漢唐雄
金笳夜吸榆關月畫幟晴搖潞水風
喜有臺端曹憲副賢勞處築儒宮

暮春呈貢縣作

一年春事已零星過眼韶光去不停風引飛花當硯落
雨添芳草上階青閑愁盡仗詩催破清夢常嫌鳥喚醒
試罷諸生無一事案頭時檢太元經

螢

不逐靡莖悴便休脫胎陽質異蜉蝣虛疑九火成奇幻
却笑明珠是暗投燄冷疎簾蕭寺雨影迷芳草渭城秋
誰知腐朽將淪沒尚有丹光一點留

初授滇南提學有成

強將疎陋事高談六籍何曾一字諳犬馬有心常戀北
鯤鵬無定又圖南非才乍可三宜去漸老寧知七不堪
眼底諸生如玉立扣鐘應是笑聲餘

奉寄同年楊洗馬王春坊二先生

欲藉征鴻問起居滿懷憂緒竟難除山中謾有非熊兆
天上應無薦鶚書南國風花淹杜牧上林詞賦擅相如
迢迢千里空相憶愁絕殘鐘落月初

秋月行司有成

幾年謫宦走天涯鏡裏西風兩鬢絲
山館月明雞唱去海天雲冷鴈書遲
半生事業交窮日萬里關山客倦時
愁絕小窗殘夢斷子規啼上最高枝

贈雪谷上人

蚤年離垢即披緇風度翛然類遠師
心淨只應流水共身閒常與白雲期
秋蟲蘭葉牕間畫暝鶴松枝几上詩
更喜地偏無客到時拈霜穎掃烏絲

雪谷能詩善畫兼工行草書法故予

詩云

云

秋暮至曲靖

故鄉何處是并州萬里關山不斷愁野館夕陽人獨立
邊城秋色水空流宦情每愧陶弘景客況何如馬少游
一夜西風吹夢破歸心遙寄楚江頭

滄浪深隱卷為貴陽林都閩題

百戰功成已白頭滄浪深處足夷猶晚風啼鳥花連屋
春雨浮鷗水滿洲地遠不聞榮辱夢身閑羞中利名鉤

幾回鼓柁烟波上傲殺元勳十八侯

重至臨安分司

公署睽違又一期重來仍值禁烟時
闌干漬雨花枝重
亭館留寒燕乳遲無事且謀犀首飲
有懷多寓少陵詩
東風可是無情甚白雪盈頭不肯吹

八月一日經淶口河

八月移舟出淶河客行又是半年過
宦情在我薄於水
時序催人急似梭鴈驚江湖秋雨積
牛羊郊野夕陽多

平生雅有桑弧志華髮星星奈老何

南行秋興

四首

皇華才詠出神州澤國砧聲已報秋江上西風吹短髮
天涯明月送孤舟仲宣自笑貧猶客李廣寧知老未侯
世事悠悠何足問且將吾道付滄洲

扁舟萬里適南荒行客驚秋覺夜涼老去形骸空駭骨
憂來世路半羊腸沙明蒲稗初含雨月冷蒹葭已著霜
忽憶舊居青瑣地幾回簪筆綴鵷行

鬢邊華髮幾絲秋老大心情不解憂杜甫詩名空短褐
元龍豪氣尚高樓思家斜月三更夢去國青山萬里舟
壯志未銷身尚健幾回燈下認吳鉤

青山萬里水漫漫客裏應知跋涉難草木變衰秋露重
湖湘漂泊晚風寒天涯有客如張詠江左何人是謝安
綠髮朱顏今改盡可憐惟有寸心丹

和地官顏寶之雨窻獨坐

春陰連日釀輕寒塵滿冠纓不用彈萬里宦情天外遠

幾宵心事雨中殘
愁來世路知音少
老去親朋見面難
怪底滇南持節使
夜深惆悵倚東闌

浪花

不用天邊帶露裁
只憑風信幾番催
一枝纔見逶迤動
萬朵俄驚頃刻開
湓浦秋容和雨亂
鏡湖春色逐人來
分明一幅西川錦
安得并刀為剪裁

庚寅三月予按思州等郡因過清浪辱叅將吳
公相留欸叙詩以酬之

年華冉冉似流波撫景其如感慨何
草滿天涯春色暮
水連湖口夕陽多鄉書路遠雙魚斷
蠻嶺雲深足馬過
賴有元戎相慰意一尊呼取聽樵歌

寫懷一首

迂疎真與世情違惆悵年來計轉非
萬里身如天外繫
十年家在夢中歸秋風楊柳隨征旆
春雨蘼蕪上客衣
遙憶白頭兄姊在一回東望一歎歔

予來滇南一載始得寄書人便書成特附四韻

楮尾

天涯薄宦苦相羈回首西風又一期
住久蒼頭迎客慣路遙黃耳到家遲
人情盡似饑鶯競心事唯應倦鳥知
倚遍闌干意難寫夕陽孤角起高陴

九月十日宿下關驛書懷

西風吹冷思綿綿老去詩篇只漫傳
半夜郵亭雞唱去十年岐路馬蹄穿
梁王宮殿生秋草蒙國河山起暮烟
薄宦驅人何日了欲將心事問蒼天

北望偶成

北望長安萬里餘，江湖憂國意何如？
許身稷契非全拙，交友雷陳已半疎。
劍器蝕殘青蟠螭，硯瓶枯盡玉蟾蜍。
壯懷牢落今如此，羞見床頭萬卷書。

漾備道中

十載馳驅不暫休，又銜君命到南陬。
涼蟬細雨疎槐晚，疲馬西風落葉秋。
萬里有家恒作客，一官多累謾成憂。
平生事業知何在，孤負滄浪舊釣舟。

宿新田驛

廢驛年深草亦深，敗垣頽壁倚危岑。
牀頭塵滿伊威集，簾外風淒絡緯吟。
孤枕不堪鄉夢斷，弊衾殊覺早寒侵。
獨憐幾樹梅花月，識我平生一片心。

登五華寺戒上人樓

乘閑時倚遠公樓，一段風烟豁醉眸。
山色遙連梁嶽晚，潮聲初湧海門秋。
酒旗城郭西風急，禾黍人家夕照收。
莫怪吟餘重回首，五雲東北是神州。

偶書

萬事無成兩鬢皤，
可堪歲月易蹉跎。
宦途每感秋蓬客，

李長吉詩：麗眉書客感秋蓬。
世態偏驚春夢婆。
上國故人青眼少，東

山高興白雲多。
何如束取琴書去，
茅屋衡門掩翠蘿。

梨花

一種精神分外奇，
肯同桃杏炫穠姿。
春香小店年年酒，

杭城人梨花時酒熟號梨花香。
月冷閒庭夜夜詩。
唐寂寥閒庭春又晚，梨花滿地不開門。

一枕暖雲鶯喚曉，
王昌齡詞：落落漠漠路不分夢中化作梨花雲。
滿簾晴雪燕

來時

杜梨花詩間道
郭西千樹雪

洗粧最惜春風面
粉褪香殘欲怨

誰

滇城早秋有懷沈啓南

遠塞風烟接海陬
蕭條蹤跡此淹留
西風黃葉填沙岸
落日青山繞郡樓
孤館不眠惟聽雨
異鄉多病厭逢秋
何因共醉吳門酒
一洗胸中萬斛愁

腐儒

老大乾坤一腐儒
支頤長日歎歸與
功名誤我難忘國

風雨懷人數寄書興入尊鱸秋水遠夢迷蕉鹿夜燈餘
何當解組居林下曲徑穿花駕小車

雪谷卷為戒上人題

一夜東風大放顛曉來深谷雪盈椽誰知定裏還生白
自信光中不礙禪三徑凍雲留鶴迹半檐寒氣壓茶烟
閉門不管青山老布衲蒲團了十玄

附七言排律

建業清明書事

節物催人。到客邊。江南風景。迴堪憐。魚兒池館。新生水。
燕子人家。又禁烟。幾片落花寒食後。數株高柳。夕陽前。
春衫小試。香羅雪駿。馬驕嘶。白玉鞭。綠水青山。渾似畫。
暖雲芳草。最宜眠。松醪有客。邀村舍。麥飯誰家。洒墓田。
自愧道傍揚子宅。十年閉戶。蟲生蠶。

為劉世亨侍御題夏仲昭墨竹

畫中看竹憶江湘。秋葉蕭蕭水氣涼。風細殘綳和粉落。
雨餘新綠過人長。高標似露螭頭筆。直幹偏含柱下霜。

傲雪襟期渾雅淡拂雲頭角正昂藏琅玕瀟灑同淇澳
紅紫妖穠陋洛陽撼撼清聲常在耳亭亭疎影半依牆
虛心自許能醫俗秀骨誰云似少香別去幾回勞夢想
興來隨處攪吟腸使君高節傳烏府仙吏清風滿太常
硯沼忽聞風雨作襪材隨見鳳鸞翔明窓日日宜相對
清興時時自不忘此外鷺塵渾絕迹唯餘明月到中堂

清風亭稿卷六